

نورك پوردي

نورك اومباقلرى مركزى هيئتى طرفندە نشر اولغور.

جلد ۲

مايس ۱۳۴۱

نومرو ۸

ایکینجی قسم

ارنلرک باغندە

— ۲ —

دومانسز بر مشعلە یە بکزمین قیزیل واوزون صاچلی باشنی ، ماصاللرده ،
سحر یازلرک معتادی اولان جاذب و مهیج بر حرکتله ایکی یانه صاللا دی :

— هی کیدی ، هی کیدی ؛ بیتدی دیمک که ، هپ او دملر !..

دیدى وکوزلرک ایچندن ، کوکله یول بولان کوزلرله ، هیج بر زمان ،
هیج کیمسه یە مکشوف اولماش بر حس منطقه سنه باقدی وشویله سویله ندى :

« — نه کورو یورم ! نه کورو یورم ! بو نه سفلی ، نه ایکنج ، نه دار ، نه
باصیق ونه قسوتلی بر عالم ! شو بولانیق صولر ، شو چوروک طوپراقلر ، شو
یانیق و بوجور آغاچلر هانکی خسیس ، ذوقسز و عبوس الەک اثریدر ؟ بوراده
کیملر یاشایور ؟ بو متعفن واولو هوا ایچنده تنبت ایدەنلر نه جنس مخلوقاتدر ؟
روحلری وارمیدر ؟ بزم کبی حواسه مالک میدرلر ؟ نه یله تعیش ایدرلر ؟ قوردلر
کبی قارنلری اوزرنده می سورونورلر ؟ چورومش داللرک عصاره سنی می امرلر ؟

« کیمدر بو چاموردن یوواسنک اوکنده چومه لن دیشلری دوکولش بو
قورو دوت یوزلی اختیار ؟ کیمدر بو پاچاورالره بورولو برچالی دهمته بکزمین
جنسیتی مشکوک غریب مخلوق ؟ کیمدر ، کیمک مولودیدر بو جیلز ، بو پیس
انسان یاوروسی که سوپرونسولکده برابر اوینادینی کوپک انیکلری بیله اوندن
دها سهویملی ودها جانلیدر . »

کوزلرینی قاپادی و آجی براشمئزاز ایله بوروشان یوزینی آلر یله اورتە رک :

— زوالی آدام ، بومی سنک درونی عالمک ؟ دیدی . بوتون سه وکیلریکک ،
بوتون احتراصلریکک ، بوتون هیجانلریکک منبی بو باطالقمیدر ؟ اوتوز بش
ییل دونوب دولاشوب ، اوتوز بش ییل یانوب طوتوشوب عاقبت قرار قیلدینک
معنوی مرحله بومزله دئی عبارتدر ؟

• بیلیرم که ، اوتهدن بری غلظت و سفلیته دوغری قلبکده بردواسز میلان وارددر .
نیلک یاغلی بالچیندن چیقاریلان سرسری موسی ایله ، اورو بحککله پرده دار اولدینی
قراکلی مفاردهده وحی بکله یین خشین محمد قدر ، بوتون اوچول و بیابان منادیلرینک
سینه قوشانلر کبی ، سنده ، کوزه لک ، نشاط و حظوظ یولنی ترک ایدمه نلردن
وعشق مذهبک منکر و مرتدلرندنسک !

لینک خطابی بونقطه یه کلنجه صبرم توکندی و دیدم :

« — ای ، سفلی ، ای منافق ، ای جهنم قاقچینی ! بو ، ایلک دفعه دکلدیر که ،
سن قارشیمه چیقورسک و بنی اضلال ایچین منطقکک اک کسکین ، اک قوی
سلاحلرینی بیله یورسک . فقط ، بنده ، آرتق ، اوبیلدیکک متردد ، قورقاق و خام
روحدن اثر قالمادی . بو ، آرتق او بیلدیکک یوموشاق ، یاپیشقان و مبهم شی دکلدیر .
ایچمده غرانیتن برقایا کبی دورویور و سرتلکی ، مهابتی بنی بیله اور کوتیور .
اونی یرندن اویناتمی ، اوکا برپارچه لرزه و یرمک ایچین نه چوق زلزله یه احتیاج
وار . سن که ، ارضک مرکزنده هیچ سونمه یین وولقاندردنه انسانلری اسیر ایدن
سیئاآتک خلقه لرینی دوکمکده سیک . سن که ، ییلدیرملر خیرسزی « پرومه نه » سک ؛
سن که ، اوستنده یاشادینمز بومشوم کره یی برچامور ییغنی کبی اوموزنده طاشیان
« آطلاس » سک ! سویله ، هانکی جهنمی اقلیمده روحی احاطه ایدن بواضطراب
عالمندن دها مهیج برهائله منبی بوله بیلیردم ؟ غم جوهرندن پیدا اولان کوکلم ایچین
سنک کاه سفلی ، کاه ایکنیج ، کاه قسوتلی بولدینک بوآلم کوشه سندن باشقه نره سی
دها اویغون برپناه اوله بیلیردی ؟

• دنیا باغچه لرینک کللرینی مرمر سینه لره براقدم ؛ هپسی ده برر برر صولسون
دیهه . و بومرمر سینه لری محترس دوداقلره براقدم ؛ تا که آتشری ، بوسه بوسه

آردنجه سونسون ديه . . . سن ، بكا سونمه ين آتشلردن وصولمايان كلردن بحث
 ايت ! فانی اولان هيچ بر شی کوزل دکلدر واضطراب نهایتسز بر آن اولدینی
 ایچیندرکه ، اونی طاتلی صانديفك بوتون حظه لره ترجیح ایتدم . غصه نك بوروشدیر-
 مدینی هانکی آلن کوزلدر ؟ عذاب آلنك دوقونمادینی هانکی وجودده حیات
 وارد ؟ بیک بر سراب ایله دولو بواوجسز وایصسز بیابانده یوقسول قلبلر قافله سنی
 رقص ایتدیرن موسیقی بر فریادك افاده سندن باشقه بر شیمیدر ؟
 « آی مفسد ، آی کندی وارلنك حکمتی بیله انکار ایدن ابلیس ؛ سنده
 برلعتك محصولی دکلېسك ؟ سنده ابدی عذاب ایله سرمست اولانلرک معبودی
 دکلېسك ؟ هائله ، سندن دوغمادی می ؟ »
 دها سویله یه جکدم . فقط قیزیل صاچلی موجود بوسوزلرم اوزرینه بر قهقهه
 حاله انقلاب ایدوب هوالرده داغیلدی .

يعقوب قدری